

SIARAN MEDIA

KEPERLUAN PENDAFTARAN PENGGUNA DATA DI BAWAH AKTA PERLINDUNGAN DATA PERIBADI 2010 (AKTA 709)

Putrajaya, Rabu, 29 Januari 2014 – Akta Perlindungan Data Peribadi 2010 (Akta 709) telah mula berkuatkuasa pada 15 November 2013. Dengan kuatkuasanya Akta 709 ini bermakna, **semua pengguna data sedia ada**¹ perlu mengambil langkah-langkah untuk mematuhi keperluan Akta ini termasuklah berdaftar dengan Pesuruhjaya Perlindungan Data Peribadi. Memandangkan tempoh Pendaftaran akan berakhir pada 15 Februari 2014, maka Jabatan Perlindungan Data Peribadi (JPDP) ingin menasihatkan semua **Pengguna Data**² yang dinyatakan dalam **Perintah Golongan Pengguna Data**³ agar menyegerakan pendaftaran dengan Pesuruhjaya.

Bagi yang perlu berdaftar, JPDP suka memaklumkan bahawa pemrosesan **data peribadi**⁴ dalam **transaksi komersial**⁵ tanpa pendaftaran merupakan satu kesalahan di bawah Seksyen 16, Akta 709 yang boleh membawa kepada penalti serta dikenakan denda tidak melebihi RM500,000.00 atau penjara tidak melebihi 3 tahun; atau kedua-duanya. Di samping itu, kegagalan pengguna data terlibat berdaftar boleh menjejaskan peluang mereka menyertai **Forum Pengguna Data**⁶ yang bakal diwujudkan bagi membangunkan Tata Amalan Pematuhan.

Golongan Pengguna Data mengikut Sektor yang wajib berdaftar berdasarkan kepada Seksyen 14 dan Perintah Perlindungan Data Peribadi P.U.(A)336 adalah seperti berikut:-

1. Komunikasi

- (a) Pemegang lesen di bawah Akta Komunikasi dan Multimedia 1998 [*Akta 588*].

- (b) Pemegang lesen di bawah Akta Perkhidmatan Pos 2012 [*Akta 741*].

2. Perbankan dan institusi kewangan

- (a) Bank berlesen dan bank pelaburan berlesen di bawah Akta Perkhidmatan Kewangan 2013 [*Akta 758*].
- (b) Bank islam berlesen dan bank islam antarabangsa berlesen di bawah Akta Perkhidmatan Kewangan Islam 2013 [*Akta 759*].
- (c) Institusi kewangan pembangunan di bawah Akta Institusi Kewangan Pembangunan 2002 [*Akta 618*].

3. Insurans

- (a) Penanggung insurans berlesen di bawah Akta Perkhidmatan Kewangan 2013.
- (b) Pengendali takaful berlesen di bawah Akta Perkhidmatan Kewangan Islam 2013.
- (c) Pengendali takaful antarabangsa berlesen di bawah Akta Perkhidmatan Kewangan Islam 2013.

4. Kesihatan

- (a) Pemegang lesen di bawah Akta Kemudahan dan Perkhidmatan Jagaan Kesihatan Swasta 1998 [*Akta 586*].
- (b) Pemegang perakuan pendaftaran suatu klinik perubatan swasta atau klinik pergigian swasta di bawah Akta Kemudahan dan Perkhidmatan Jagaan Kesihatan Swasta 1998.
- (c) Pertubuhan perbadanan yang didaftarkan di bawah Akta Pendaftaran Ahli Farmasi 1951 [*Akta 371*].

5. Pelancongan dan hospitaliti

- (a) Orang berlesen yang menjalankan atau mengendalikan suatu institusi latihan pelancongan, pengendali pelancongan berlesen,

agen pelancongan berlesen, dan pemandu pelancong berlesen di bawah Akta Industri Pelancongan 1992 [*Akta 482*].

- (b) Orang yang menjalankan atau mengendalikan suatu premis penginapan pelancong berdaftar di bawah Akta Industri Pelancongan 1992.

6. Pengangkutan

- (a) Malaysian Airlines System (MAS).
- (b) Air Asia.
- (c) MAS Wings.
- (d) Air Asia X.
- (e) Firefly.
- (f) Berjaya Air.
- (g) Malindo Air.

7. Pendidikan

- (a) Institusi pendidikan tinggi swasta berdaftar di bawah Akta Institusi Pendidikan Tinggi Swasta [*Akta 555*].
- (b) Sekolah swasta atau institusi pendidikan swasta berdaftar di bawah Akta Pendidikan 1996 [*Akta 550*].

8. Jualan langsung

Pemegang lesen di bawah Akta Jualan Langsung dan Skim Anti-Piramid 1993 [*Akta 500*].

9. Perkhidmatan

- (a) Suatu syarikat berdaftar di bawah Akta Syarikat 1965 [*Akta 125*] atau seorang yang mengikat perkongsian di bawah Akta Perkongsian 1961 [*Akta 135*] yang menjalankan perniagaan seperti yang berikut:
 - (i) undang-undang;

- (ii) audit;
 - (iii) perakaunan;
 - (iv) kejuruteraan; atau
 - (v) arkitek.
- (b) Suatu syarikat berdaftar di bawah Akta Syarikat 1965 atau seorang yang mengikat perkongsian di bawah Akta Perkongsian 1961 yang menjalankan perniagaan runcit dan perniagaan borong yang ditakrifkan di bawah Akta Kawalan Bekalan 1961 [*Akta 122*].
- (c) Suatu syarikat berdaftar di bawah Akta Syarikat 1965 atau seorang yang mengikat perkongsian di bawah Akta Perkongsian 1961, yang menjalankan perniagaan agensi pekerjaan swasta di bawah Akta Agensi Pekerjaan Swasta 1981 [*Akta 246*].

10. Hartanah

- (a) Pemaju perumahan berlesen di bawah Akta Pemajuan Perumahan (Kawalan dan Pelesenan) 1966 [*Akta 118*].
- (b) Pemaju perumahan berlesen di bawah Enakmen Pemajuan Perumahan (Kawalan dan Pelesenan) 1978, Sabah.
- (c) Pemaju perumahan berlesen di bawah di bawah Ordinan Pemaju Perumahan (Kawalan dan Perlesenan) 1993, Sarawak.

11. Utiliti

- (a) Tenaga Nasional Berhad.
- (b) Sabah Electricity Sdn. Bhd.
- (c) Sarawak Electricity Supply Corporation.
- (d) SAJ Holding Sdn. Bhd.
- (e) Air Kelantan Sdn. Bhd.
- (f) LAKU Management Sdn. Bhd.
- (g) Perbadanan Bekalan Air Pulau Pinang Sdn. Bhd.

- (h) Syarikat Bekalan Air Selangor Sdn. Bhd.
- (i) Syarikat Air Terengganu Sdn. Bhd.
- (j) Syarikat Air Melaka Sdn. Bhd.
- (k) Syarikat Air Negeri Sembilan Sdn. Bhd.
- (l) Syarikat Air Darul Aman Sdn. Bhd.
- (m) Pengurusan Air Pahang Berhad.
- (n) Lembaga Air Perak.
- (o) Lembaga Air Kuching.
- (p) Lembaga Air Sibul.

Bagi Golongan Pengguna Data yang tidak tergolong dalam Perintah Golongan Pengguna Data, mereka masih tertakluk dengan Akta 709 dan dinasihatkan mengambil langkah-langkah pematuhan yang diperlukan. Ini termasuklah menyediakan, meneliti semula atau menambahbaik polisi sedia ada, prosedur, proses dan sistem yang berkaitan pemprosesan data peribadi agar ianya selari dan selaras dengan keperluan Akta 709.

Maklumat lanjut mengenai pendaftaran proses pendaftaran boleh diperolehi dengan melayari halaman sesawang www.pdp.gov.my

Disahkan oleh:

t.t.

.....
(ABU HASSAN BIN ISMAIL C.A.)

Pesuruhjaya Perlindungan Data Peribadi Malaysia
Tarikh: 28 Januari 2014

TERMA RUJUKAN

¹ “**Semua Pengguna Data sedia ada**” bermaksud mana-mana syarikat atau pengguna data yang telah beroperasi sebelum Akta dikuatkuasakan iaitu pada **15 November 2013**. Manakala, mana-mana syarikat atau Pengguna data yang beroperasi selepas 15 November 2013 **adalah tidak tertakluk kepada tempoh 3 bulan pendaftaran seperti yang dimaksudkan**.

²“**Pengguna Data**” ertinya seseorang yang sama ada berseorangan atau bersekesama atau bersama dengan orang lain memproses apa-apa data peribadi atau mempunyai kawalan terhadap atau membenarkan pemprosesan apa-apa data peribadi, tetapi tidak termasuk seorang pemproses data;
“pengguna data yang berkaitan”, berhubung dengan—

- (a) sesuatu pemeriksaan, ertinya pengguna data yang menggunakan sistem data peribadi yang menjadi subjek pemeriksaan itu;
- (b) sesuatu aduan, ertinya pengguna data yang dinyatakan dalam aduan itu;
- (c) sesuatu penyiasatan—
 - (i) dalam hal suatu penyiasatan yang dimulakan dengan suatu aduan, ertinya pengguna data yang dinyatakan dalam aduan itu;
 - (ii) dalam mana-mana hal lain, ertinya pengguna data yang menjadi subjek penyiasatan itu;
- (d) sesuatu notis penguatkuasaan, ertinya pengguna data yang terhadapnya disampaikan notis penguatkuasaan itu.

³“**Perintah Perlindungan Data Peribadi Golongan Pengguna Data 2013**”
http://www.pdp.gov.my/images/pdf_folder/pua_20131114_P.U._A_336-PERINTAH_PERLINDUNGAN_DATA_PERIBADI_GOLONGAN_PENGGUNA_DATA_2013.pdf

⁴“**Data Peribadi**” ertinya apa-apa maklumat yang berkenaan dengan transaksi komersial, yang—
(a) sedang diproses secara keseluruhannya atau sebahagiannya melalui kelengkapan yang dikendalikan secara automatik sebagai tindak balas kepada arahan yang diberikan bagi maksud itu;
(b) direkodkan dengan niat bahawa ia sepatutnya diproses secara keseluruhannya atau sebahagiannya melalui kelengkapan itu; atau

(c) direkodkan sebagai sebahagian daripada sistem pemfailan yang berkaitan atau dengan niat bahawa ia sepatutnya menjadi sebahagian daripada sistem pemfailan yang berkaitan, yang berhubungan secara langsung atau tidak langsung dengan seorang subjek data, yang dikenal pasti atau boleh dikenal pasti daripada maklumat itu atau daripada maklumat itu dan maklumat lain dalam milikan seorang pengguna data, termasuk apa-apa data peribadi sensitif dan pernyataan pendapat tentang subjek data itu; tetapi tidak termasuk apa-apa maklumat yang diproses bagi maksud suatu perniagaan pelaporan kredit yang dijalankan oleh sesuatu agensi pelaporan kredit di bawah Akta Agensi Pelaporan Kredit 2010.

⁵ “**Transaksi Komersial**” ertinya apa-apa transaksi bersifat komersial, sama ada secara kontrak atau tidak, yang termasuk apa-apa perkara yang berhubungan dengan pembekalan atau pertukaran barang atau perkhidmatan, agensi, pelaburan, pembiayaan, perbankan dan insurans, tetapi tidak termasuk sesuatu perniagaan pelaporan kredit yang dijalankan oleh sesuatu agensi pelaporan kredit di bawah Akta Agensi Pelaporan Kredit 2010.

⁶ “**Forum Pengguna Data**”

http://www.pdp.gov.my/index.php?option=com_content&view=article&id=395&Itemid=521&lang=ms

Pejabat Pesuruhjaya
Aras 6, Kompleks Kementerian Komunikasi dan Multimedia Malaysia
Lot 4G9, Presint 4, Persiaran Perdana
62100 Putrajaya
Tel: 03-89115000 / 7901/ 7927/ 7911/ 7906
Faks: 03-8911 7959
E-mel: warga@pdp.gov.my
E-mel Aduan/Pertanyaan: aduan@pdp.gov.my
Website: www.pdp.gov.my

Kaunter Pendaftaran Pengguna Data

Pertanyaan: Telefon: 03 8911 5113 / 5119